

quinque Episcoporum generibus, deque eorum dignitate, auctoritate & muniis, quæ ne de ignoto agere videremur, præmittenda duximus.

IX.
DE HUIUS
OPERIS FINE
ET METHODO.

De his nobis figillatim dicendum, & quæ in universa Ecclesia sedes Patriarchales, Exarchicæ, Metropolitanæ, & Episcopales fuerint, per ordinem cum Deo narrandum. Dicemus autem ex Epistolis summorum Pontificum, ex Conciliis, ex Patribus, ex historia Ecclesiastica & civili, & ex peritissimis primorum Ecclesiæ sæculorum Geographis, & per ipsamet eorum quantum in nobis erit verba, ut potiori ratione antiqua censeatur hæc Notitia. Sic veterem Ecclesiæ ordinem, hoc est Catalogum sedium Episcopaliū Ecclesiæ, prout aliæ aliis subiciebantur, illustrabimus; id autem usque ad finem sexti sæculi mortemque D. Gregorii magni, cum post hæc Ecclesia ab Imperatoribus, quantum ad dioeceses maxime, immutata fuerit.

Cum autem omnis doctrina methodo clarior atque intellectu facilius fiat, eundem ordinem sequemur quem Imperator Constantinus, & postea Theodosius, Arcadius & Honorius in magistratuum Imperii descriptione. Atque ad id potissimum adducti sumus, quod tunc Ecclesia, quasi commensurata fuerit Imperio, eaque paucis admodum in Provinciis extra Imperii fines radices fixerit. Romanus Patriarcha, solos Caledonios & Hybernos adiecit; Alexandrinus, Indos & Æthiopes; Antiochenus, Persas & Babylonios; Constantinopolitanus vero, reliquas ex barbaris Asiæ provinciis, scilicet Russiam, Scythiam & Sarmatiam Asiaticas. Adde quod sicut nullus ordo clarior, ita nec ullus convenientior, cum magna ex parte antiqua dioeceseon Ecclesiasticarum divisio civili conformis fuerit. Ecclesia orbem suum distribuit in Patriarchatus, quibus Patriarchas præfecit; sicut Imperatores Imperium suum diviserant in Præfecturas, quæ à Præfectis Prætorio administrabantur. Ecclesia Patriarchatus in dioeceses ex pluribus provinciis compositas Exarchis seu Primatibus suis divisit; sicut Imperatores Præfecturas item in dioeceses subjectas Vicariis Præfectorum. Ecclesia Dioeceseon provincias singulis Metropolitanis distribuit; sicut Imperatores easdem singulis Præsidibus provinciarum commiserant. Denique Ecclesia unamquamque civitatem proprio Episcopo & Cleri sui consilio regendam dedit; sicut Imperatores has omnes Curialibus Magistratibus administrandis subjecerant. Cum igitur eadem ratio in divisione utriusque Imperii Ecclesiastici & Civilis servata fuerit, penè eundem ordinem in illustranda Ecclesiæ notitia servabimus, quem Imperatores in describendis Imperii sui Magistratibus. Si quidquam dissimile reperiatur, una causa erit diversus numerus Antistitum & Magistratuum. Non enim idem fuit, cum quinque Patriarchas Ecclesia agno-